

RELATION
VERITABLE
 DE LA
BATAILLE
NAVALE,


GAIGNEE PAR MONSIEVR
 de Guise, General de la mer, sur les
 Rochelois, le 27. Octobre. 1622.



A PARIS,
 Chez CHARLES CHAPPELLAIN, rue vieille Bou-
 clerie, prez le Pont S. Michel.
 M. DC. XXII.



RELATION VERITABLE
DE LA BATAILLE NAVALE,
gagnée par Monsieur le Duc de
Guise General de la Mer, sur les
Rochelois, le 27. Octobre 1622.


 I E V a jusques à présent fauorisé
 les Armes du Roy, d'une grace
 si particuliere, qu'on ne peut pas
 reuoquer en doute que l'œil de
 sa diuine Prouidence ne soit tousiours ou-
 uert à la garde & protection de cette Mo-
 narchie, contre l'audace & la felonnie de
 ceux qui en osent mediter la subuersion.
 Et si ses fideles seruiteurs s'animent de le
 seruir à qui mieux mieux aupres de sa per-
 sonne, on void que ceux qui en sont
 les plus éloignez ne leur cedent en ze-
 le & en affection, à s'acquitter dignement
 de ce qu'ils doiuent à leur Patrie. Monsieur
 le Duc de Guise entr'autres, vray imitateur
 de la generosité de ses Peres, qui sous les
 auspices de nos Rois ont tousiours releué
 l'honneur des Autels, auoit vne telle im-
 patience de veoir que l'injure du temps
 & la contrariété des vents le retardoit de.

faire quelque signalee expedition de guerre, qu'en fin il a pris la premiere occasion qui s'en est presentee, comme s'ensuit.

Il est donc à sçauoir que le 24. Octobre l'armée Nauale de sa Majesté arriua en veuë des terres, où elle fut contrainte de mouiller à l'entrée du pertuis Breton au pres des Balenes, auquel lieu se rendit Monsieur le Comte de la Rochefoucault avec 15. cens hommes de pied, & deux cens Gentils-hommes dans des petits vaisseaux, tout cela destiné pour mettre pied à terre apres le combat.

Les galeres estant aduancées se trouuerent au rendez-vous, & demurerent tout le iour en présence de l'armée ennemie cependant que M. le Comte de Ioigny, general des Galeres, alla trouuer Monsieur de Guise pour receuoir l'ordre qu'il luy plairoit luy dōner: le reste de ceste journée fut employé par Monsieur de Guise à travailler aux ordres que l'armée auroit à tenir pour la bataille. De sorte que l'armée ne pouuāt faire chemin que par la marée, à cause du grand calme, ce qu'elle peust faire fust d'aller mouiller où les galeres s'étoient aduancées, enuiron deux heures de nuict. Sur quoy il fut resolu d'assembler tous

les Capitaines deux ou trois heures deuant le iour, ce qui se fit le 26. & apres auoir séparé l'armée en trois brigades, à sçauoir celle de l'Admiral, Vice-Admiral & Contre-Admiral, & donné rang à tous les Capitaines pour marcher par files, & auoir les costés des nauires libres pour faire iouër l'artillerie sans les endommager, Monsieur le General des galleres fust ordonné pour aller taster les ennemis, qui parurent à l'ancre à la rade de l'Isle de Ré, au deslouz de saint Martin, lesquels voyans auancer les Galeres, & l'armée du Roy paroistre, se mirent souz les voiles, le vent ne seruant gueres à l'armée du Roy, & la marée se retirât. Tout ce qu'õ peust faire, ce fut d'approcher d'une lieuë les ennemis, qui voyans les Galeres, commencerent de leur tirer des canonnades & les galeres à eux. Mōsieur de Guise prit lors resolution d'aller luy mesme recognoistre l'armée ennemie, & à cest effect manda à Monsieur le General de luy enuoyer vne Galere, cependant il se mit dedans vne felouque avec Monsieur le Cōte de la Rochefoucaut, & quatre ou cinq Gentils-hommes, & ayant rencōtré la Galere, il monta dessus, & trouua Monsieur le General incontinent apres, à qui il auoit

donné ordre de ne s'engager point, & de l'attendre. Apres cela il monta sur la Reale, & se resolut d'approcher les ennemis pour distinguer la portée de leurs vaisseaux & le calibre de leurs pieces. Ce qui se fit si à propos que l'attaque se commença peu à peu, & en fin s'eschauffa si fort que les ayans trouvez de nouveau mouillés, il les contraignit de se remettre à la voile, s'approchans aux mousquetades, & faisant mettre les Galeres de frōt, les écartās l'une de l'autre de cēt ou six vingts pas. Tous les Canōs de Courrier cōmencerent à jouier, en façon que l'on voyoit force bois que la marce emmenoit des éclars que le Canon y faisoit; tellement qu'il jugea que l'occasion estoit belle de les combattre; Il manda a Monsieur de S. Luc, Vice-admiral, de faire aduancer l'armee, & de faire toute force de voiles. Ce qui fut fait avec tant de vigueur, que les Capitaines à l'enuy l'un de l'autre s'aduāçoiēt le plus qu'ils pouuoïēt, quittans leur ordre pour le desir qu'ils auoiēt de joindre l'ennemy, qui n'estoit qu'à vne petite demy lieuë d'eux. Sur ces entrefaites Monsieur de Guise alla en toute diligencereprendre la place sur l'Admiral,

& arresta les Nauires les plus aduancees, qui estoient déjà aux Canonades. Les ennemis rendirent le bord vers les bas fonds au long des Isles, & insensiblement, tout le monde croyant qu'ils fuyoient, gagnerēt le vent si auant, que l'on jugea qu'on ne le leur pouuoit plus disputer. Ils separerent leur armee en trois Corps, comme celle du Roy, & s'approchans peu à peu, monstrent qu'ils vouloient combattre. Les Canons commencerent donc dès lors de venir à portee. Cela fut sur les trois heures apres midy, & les plus éloignez des nostres faisans force de voiles, nous fûmes incontinent aux mousquetades.

Les ennemis voyans que nos plus grands & plus pesans Nauires ne gaignoiēt si bien au vent que les petits, ils resolurent de venir à bord à nostre Avant-garde, ce qu'ils executerent si bien, qu'incontinent ils furent aux mains, où Monsieur de S. Luc, qui commandoit ladite Avant-garde, & qui fut attaqué le premier, fit tres-generousement, ayant soustenu le choc de tous les ennemis.

Le Gallion de Malte, à qui Monsieur le General auoit enuoyé deux Galleres pour

le remorquer, s'aduança, & les autres qui estoient sous-vent, toutes les Galleres r'assemblees allerent aussi regagner le vent, pour tirer à l'ennemy par les flancs.

L'Admiral par des bordées essayoit le plus qu'il luy estoit possible de monter au vent. En fin voyant toute l'armée fondre sur l'auantgarde, & la voyāt en tres-grād danger, au lieu de faire vn autre bord du costé de la bataille, il reuira tout court, & s'alla opposer seul à l'armée ennemie. Ce fut lors & en vne occasion si hazardeuse, où tous les officiers & pilotes du vaisseau se jetterēt aux pieds de Monsieur de Guise pour luy remontrer le peril où il s'alloit engager, ne pouuant estre assisté ny secouru d'aucun de ses vaisseaux, estants au dessous du vent: mais luy surmontant genereusement tout ce qui pouuoit trauerser son dessein, il se resolut de passer outre, & d'approcher les ennemis pour sauuer son Auant-garde, qui autrement couroit fortune. Ce qui fut cause qu'ils tournerēt tous vers luy, & vindrent l'inuestir avec vn grand ordre, conduisans deuant eux à la faueur du Canon & des mousquetades, deux Nauires d'artifice, & pleins de feu, attachées avec des chaines, & apres auoir
fait

9
fait toute leur salue, criant à bord, à bord, ils attacherent avec des grappins les deux Nauires de feu aux hauts bancs du Mast de nostre Admiral, qui prirent feu si soudain par le dedans & par leurs voiles, que la flânte monta tout à coup aussi haut que les Gabies. C'est vne rodomontade dont les Rochelois s'estoient vantez auant que de partir, comme s'il eust esté aussi facile de brusler nostre Admiral comme ils auoient legerement promis.

Cependant leur mousquetairie & leur artillerie iouïoit incessamment, & ce fut lors que le Sieur de Vinceguerre fut tué d'une mousquetade estant sur le Pont de corde auprès de Monsieur de Guise, qui luy commandoit de remedier au feu & que pour luy il pouruoieroit au reste,

Ce Combat dura deux heures de iour, & la nuict commençant il ne cessa pas de continuer encore plus d'une bonne heure; & fut si opiniâtre que beaucoup des ennemis fu-

rent tués par les nostres à coups de picques.

Monsieur de Tauane commandoit au Chasteau de Proüe, Monsieur le Comte de Carse du costé du Chasteau de Poupe & Monsieur de Queruenau aux volontaires qui estoient separez sous eux.

Les Gardes de Monsieur de Guise & quelques Gentils-hommes de Monsieur le Comte de la Rochefoucault combattoient au tillac du grand Mast, Monsieur de Guise tousiours accompagné de Monsieur le Comte de la Rochefoucault, alloit incessamment par tout pour pouruoir à ce qui estoit necessaire. Le sieur de la Verdier Lieutenent de la compagnie de Gens-darmes de Monseigneur de Guise, qui portoit les Commandemens de tous costez y fut blessé d'une Mousquetade à la teste. Quelques autres Gentils-hômes & Officiers tuez, entr'autres le Nocher de son Nauire qui assistoit le Segnor Vassale & le Sergent de bataille, qui firent des merueilles à

esteindre le feu qui estoit desia tres-grand, & quasi sans esperance de salut. Il fut neantmoins esteint par la diligence qu'on y apporta en moins d'une heure: Le bon heur fut que les ennemis quittans la partie, abandonnerent l'Admiral & donnerent loisir à ne traualier plus qu'à esteindre le feu, dont il eust esté tres-mal-aysé de se garentir, si tout ensemble il eust fallu combattre & l'esteindre.

Il est incroyable quelle fut la ioye du reste de nostre armée qui ne nous pouuoit plus secourir à cause du vent & de la marée, laquelle vit que l'Admiral mettoit les ennemis en route & les menoit battant, sur la crainte qu'ils auoient que l'ennemy ne l'eust bruslé tout à fait. Ce qui donna vn tel courage à toute l'armée du Roy, qu'elle tascha de se rallier en mesme temps, crians de tous costez Victoire, iusques à trois heures de nuict, laquelle deuint soudain si obscure que nos Nauires s'entre-abordoient les vns les autres, si bien que les ennemis se seruans de l'oc-

casion se retirèrent, & lors nostre Admiral qui commāçoit à toucher, n'estant plus qu'à trois brasles d'eau en suiuant l'ennemy, fut contrainct de s'arrester, lors il fit phanal & se trouua tout seul fort lōg temps pour s'estre aduancé dans la chaleur du combat plus d'une lieuë par delà où il s'estoit commencé.

Les premiers vaisseaux qui le vindrent ioindre long temps apres, furent la Vierge, où estoit le Sieur de Manty Contr'-admiral, le sieur Cheualier de Cuges, qui fut tué estant sur le Vice-admiral de leuant, & le sieur de l'Isle Lieutenant de Monsieur le Cheualier de Valencé.

Le Gallion de Malte fut inuesty de trois vaisseaux, & secouru de Cuges, qui mirent à fond le Nauire d'Arnault qui estoit de quatre cens tonneaux, où estoient grād nombre de Gentils-hommes & volontaires de la Rochelle, qui furent tuez ou noyez, horsmis le Capitaine & vn Conseiller de la Rochelle qui sont prisonniers.

Il se trouue dix Nauires à fond des ennemis, plus de deux mille homes morts ou noyez , & des nostres quelques quatre cens.

L'Armée ennemie s'enfuit vers 30. Vaisseaux Flamands, qui ne s'estoiēt point meslez au combat , afin qu'on ne recogneust pas au iour leur perte.

Ils leur ont esté tous les hommes qu'ils ont peu pour regarnir leurs vaisseaux , s'il y eust eu yne heure de iour d'auantage il en fust fort peu eschappé.

Leur armée ne se peut rallier que le lendemain au matin, Monsieur de S. Luc ser'allia de son costé à mesme heure avec 30. vaisseaux auprès de Monsieur de Guise, & Monsieur le General des Galeres aussi, lequel apres a durant le calme coulé à fond à coups de Canon le Saint Louys qui estoit l'vn des vaisseaux de Monsieur de Neuers, que ceux de la Rochelle auoient pris l'an passé.

Le lendemain les ayant esté recognoistre on a veu vne vingtaine de leurs vaisseaux eschoüés & brisez de

noz Canōs. Tellement que de soixāte & dix vaisseaux des ennemis qu'ils auoient le iour de la bataille, il n'en est plus paru de reste que 32. lesquels on espere de ruyner avec le Canon, d'autant qu'on ne peut aller à eux sans eschoüer. Ils ont tesmoigné vne grande audace, & ont tres-vaillamment combattu, comme gens qui vouloient mourir ou vaincre.


Tous les corps des armées ont esté meslés de part & d'autre, & abordés l'espace de deux heures de iour, l'obscurité de la nuit a sauué ce qui restoit aux ennemis, d'autant que crians Sainte Vierge & viue le Roy, comme nous, qui estoit le mot de l'Armée du Roy, & que nous ne pouuions plus discerner nos marques, nos Vaisseaux s'entrechoquoient l'un l'autre.

Voila au vray ce qui s'est passé en la bataille, en laquelle il ne s'est trouué aucun Chef ny Capitaine qui n'ayt rendu des preuues de sa valeur. La meslée a esté si rude qu'on peut dire avec verité, qu'il s'est tiré de part

& d'autre plus de quinze mil coups de canon. Il n'est pas mesmement à oublier que le lendemain du Combat, Monsieur de Guise ayant rallié ses forces, enuoya sommer ceux qui commandoient à la Dyue de se rendre, qui est vn fort fait en vne Isle fort pres de l'Aiguilon qu'ils auoient surpris depuis peu, lesquels se sont rendus à discretion.

Finalemēt comme Monsieur de Guise estoit sur le poinct de poursuiure sa Victoire; & de faire prendre terre à son Armée dans les Isles tenues par les Rochelois, il receut lettres de sa Majesté qui l'asseuroit de la paix. Ce qui a tout à fait arresté le cours d'vne plus grande expedition qui luy estoit cōme toute assurée, tant il a de confiance en la protectiō de Dieu vray vengeur de la querelle des Roys.

F I N.



PERMISSION.

IL est permis à Charles Chapelain
d'Imprimer vn discours intitulé,
Relation veritable de la Bataille
Nauale, gagnée par Monsieur le
Duc de Guise, sur les Rochelois, &c.
& deffence à tous autres, &c. Faict
ce 4. Nouembre 1622.